

WILLIAMS, DAVID (1779 - 1874), Troedrhiwdalar, gweinidog gyda'r Annibynwyr

Enw: David Williams
Dyddiad geni: 1779
Dyddiad marw: 1874
Rhyw: Gwryw
Galwedigaeth: gweinidog gyda'r Annibynwyr
Maes gweithgaredd: Crefydd
Awdur: John Dyfnallt Owen

Ganwyd 27 Ionawr 1779 yn Nantydderwen, plwyf Llanwrtyd, sir Frycheiniog. Hanoedd o hen linach enwog yn y fro, ac o ochr ei fam o deulu [John Penry](#); cafodd hyfforddiant crefyddol ar aelwyd ei rieni, a bu am ysbaid yn ysgol offeiriad plwyf Llanwrtyd. Derbyniwyd ef yn aelod yn Llanwrtyd gan [Isaac Price](#). Prentisiwyd ef yn grydd. Aeth i Lanymddyfri yn 1796 a Merthyr Tydfil yn 1797, a bu ganddo ran flaenllaw yng nghychwyn achos Annibynnol yno. Dychwelodd gartref a dechreuodd bregethu yn Llanwrtyd yn 1799. Bu am bedair blynedd yn pregethu cyn cael ei ordeinio, a mynd ar daith yn 1800 mor bell a Gogledd Cymru. Urddwyd ef yn weinidog Llanwrtyd a Throedrhiwdalar ar 8 Awst 1803. Estynnodd y Bwrdd Presbyteraidd rodd o £5 iddo ar yr achlysur. Sefydlodd achosion ym Methel, Cynghordy (dyffryn Tywi), Ebeneser, ar du dwyrain Epynt, Abergwesyn, Beulah, ac Olewydd, a swcro pob achos gwan yng Nghantref Buellt. Gwelodd gyfnodau o ddiwygiadau nerthol ac ychwanegwyd cannoedd lawer at ei eglwysi. Daeth penllanw ei weinidogaeth ym mlwyddyn ei jiwibili, sef 1853. Dathlwyd yr amgylchiad ar raddfa fawr a chyflwynwyd darlun ohono mewn olew i Goleg Aberhonddu. Ymddeolodd 6 Awst 1866, eithr daliodd i bregethu hyd ddiwedd ei oes. Bu farw 20 Awst 1874. Meddai gorff iach, cydnerth, llais clir, clochaid, parabl rhwydd, ac arddull boblogaidd iawn. Pregethai bob blwyddyn yng nghymanfaoedd Gogledd a De. Yr oedd yn bregethwr gwresog, efengylaidd yn ôl urdd [Howel Harris](#) a diwygwyr y 18fed ganrif. Tebyg iddo deithio a phregethu gymaint, onid mwy, na neb yn ei gyfnod.

Awdur

Y Parchedig John Dyfnallt Owen, (1873 - 1956)

Ffynonellau

Cofiant David Williams, Troedrhiwdalar (1877), 1877

Y Tyst, 28 Awst 1874

The Congregational Year Book, 1874

Y Dysgedydd, Medi 1874

Dolenni Ychwanegol

Wikidata: [Q20732898](https://www.wikidata.org/wiki/Q20732898)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

